

– Այստամենայնիւ, մենք պետք է բաժանուենք միմեանցից:

– Այո՛ , պետք է բաժանուենք...

Նրա ծայնը դողաց:

Վերջին օրերում ես այն աստիճան սկսել էի սիրել եւ յարգել այդ ազնիւ երիտասարդին, որ, կարծես, մի բան կտրոնցաւ իմ սրտից, երբ լսեցի, որ բաժանուելու ենք միմեանցից եւ գուցէ այլեւս չէինք տեսնի միմեանց: Ես սկսեցի աղաչել նրան.

– Գոնէ այս գիշեր մնացէք մեզ մօտ:

– Մեծ ուրախութեամբ կը մնայի, եթէ կարելի լիներ...

Յետոյ խօսքը փոխեց.

– Բայց դուք էլ երկար չէք մնալու այստեղ:

Ասլանը, որ լուռ դիտում էր մեր սրտերի զեղմունքը, անելի տխրեցրեց ինձ, ասելով.

– Մի բանի ժամից յետոյ մենք պետք է թողնենք այդ քաղաքը:

– Գիշերո՞ւմ:

– Այո՛ , գիշերով:

Ի՞նչ էր պատահել, ի՞նչ յարկ կար այդպէս շտապելու: Նրանք ինձ ոչինչ չասացին: Միայն նկատում էի, որ Ասլանը նոյնպէս մի առանձին թախծութեան մէջ էր գտնուում: Երեւի, սիրելի ընկերից բաժանուող նրան եւս տանջում էր:

Հասաւ բաժանման ծանր րոպէն: Չալլաղը մօտեցաւ նախ Ասլանին, գրկեց նրան: Ոչինչ չխօսեցին, ոչինչ չասացին միմեանց: Երկար, լուռ գրկախառնութեան մէջ էին գտնուում նրանք: Մէկի գլուխը դրած էր միւսի ուսի վրայ: Մէկի ձեռքերը փաթաթուած էին միւսի պարանոցին: Չէին խօսում, բայց լռութեան մէջ շատ բան էին ասում միմեանց:

Ա՛խ, որքա՛ն վսեմ, որքա՛ն բարձր բան է ճշմարիտ բարեկամութիւնը: Որքա՛ն հոգու եւ զգացմունքների սրբութիւն կայ նրա մէջ: Այդ բոլորը տեսնելով, իմ սիրտը նոյնպէս լցում էր մի սրբազան ցերմութեամբ, իմ զգացմունքները նոյնպէս ազնուանում էին:

Նա թողեց Ասլանին եւ մօտեցաւ ինձ: Կարօյից բաժանուելու ժամանակ ես լաց չեղայ, բայց երբ նրա դողդոջուն ձեռքերը փաթաթոնցան իմ պարանոցին, ես չկարողացայ զսպել իմ արտասուքը: Նա նոյնպէս յուզուած էր, նրա հեզ, հրեշտակային աչքերը նոյնպէս ծփում էին: